

Per la terza generaziun dependi dal tat u da la tatta

■ **(sda/anr) Esters ed estras da la terza generaziun duain survegnir pli tgunsch il dretg da burgais. Areguard las cundiziuns n'èn il cussegl naziunal ed il cussegl dals stans dentant anc betg perina en tuts puncts. Disputaivlas restan las premissas areguard tat u tatta.** Tenor la veglia dal cussegl naziunal sto u il tat u la tatta esser naschè en Svizra per ch'insatgi vala sco «ester da la terza generaziun». Sche quai n'è betg il cas ston ins render verdaivel che in dad els ha gè il dretg da dimora. Il cussegl naziunal ha decidì ier cun 115 cunter 72 vuschs da tegnair ferm vi da quest punct.

Al cussegl dals chantuns na basta il «render verdaivel» betg: Tenor el stuess u il tat u la tatta avair gè per propi il dretg da dimora. En il cussegl naziunal è ina minoritad burgaisa s'engaschada per questa versiuin. I sa tractia d'ina versiuin pli clera, han ils represchentants argumentà.

Difficil fin nunpussaivel

Ils adversaris han discurrì d'ina schicana. Era la ministra da giustia ha rendì attent ch'i saja «difficil fin nunpussaivel» da mussar si quai en la pratica. Il register central d'esters vegnia manà pir dapi il 1972 a moda electronica.

Cédric Wermuth (ps/AG) ha menziunà l'exempel da sia tatta ch'è vegnida il 1940 en Svizra. Per cumprovar ch'ella haja gè il dretg da dimora stuess el ir en l'archiv chantunal da Berna a tschertgar documents. *Balthasar Glättli* (verds/ZH) ha constatà ch'i fiss absurd da pretender ina cumprova sch'il stadi sez n'haja gnanca l'infurmaziun.

Esser stà a scola

Tar las autras premissas segua il cussegl naziunal la chombra pitschna. Tenor quellas sto almain in dals geniturs esser naschè en Svizra, avair vivì diesch onns en Svizra ed avair visità tschintg onns la scola.

In ester u ina estra da la terza generaziun sto medemamain esser naschè en Svizra. Plinavant sto el u ella avair visità almain tschintg onns la scola obligatoria en Svizra.

Tschentar la dumonda per ina natiralisaziun facilitada pon ins mo enfin la vegliadetgna da 25 onns. Uschia vulan las duas chombras evitar ch'ils esters mitschan da l'obligaziun da prestar servetsch militar.

Il cussegl dals chantuns sto anc ina giada s'occupar da questa fatschenta. L'ultim pled ha lura il pievel, damai ch'i basegna ina midada da la constituziun.